

續唐書

卷二十至卷二十七

志下
刑法

世家上

岐
吳
梁
蜀
後蜀
南漢

續唐書卷二十

海昌陳鱣撰

武林姜安
長水祝恂
全校

食貨志

自太史公爲平準書而班史述食貨志於是後之作史者
若續漢若晉若隋唐皆志食貨焉食貨之名蓋本諸洪範
八政一曰食二曰貨王者量地以制邑度地以居民置廬
井以安之通貨財以富之總土地所生料山澤之利書言
奏庶鮮食懋遷有無皆因其所利而導之順其所欲而化
之不違農時不竭民力此五帝三皇剏垂之教也周官太
府掌九貢九賦之法誠以國家經用自有權衡卽取之於

民而上下相安者取之有道用之有節故耳由漢至隋詳於各史唐都長安而關中素稱沃野然土地甚狹所入賦稅不足以給國用自天寶以來大盜橫行方鎮屢叛兵革不息用度日煩兼以驕君暗主壞亂經常由是聚斂之臣進而財利之說興爲兼并爲兩稅至於鹽鐵轉運屯田和糶鑄錢括苗權利借商進奉獻助弊端百出以至於亡及莊宗平梁任吏人孔謙爲租庸使峻法厚斂剝民奉公民產旣竭軍食遂虧加以荒歉頻仍兵戈迭起不數年間遂致顛覆南唐地小年促又不足言矣舊史殘闕今姑錄其一二焉

同光三年春二月勅魏府小菜豆稅每畝減放三升城內店肆園圃比來無稅頃因僞命遂有配徵後來以所徵物色添助軍裝衣賜將令通濟宜示矜蠲今據緊慢去處於見輸稅絲上每兩作三等酌量納錢收市軍裝衣賜其絲仍與除放其年閏二月吏部尙書李琪上言請賦稅不以折納爲事一切以本色輸官又不以紐配爲名止以正稅加納勅曰本朝征料惟配有兩稅至於折納當不施爲宜依李琪所請應逐稅合納錢物斛斗鹽錢等宜令租庸使指揮並準元徵本色輸納不得更改若合有改移卽須具事由聞奏

續唐書卷二十一
天成元年夏四月勅應納夏秋稅先有省耗每斗一升今後止納正稅數不量省耗

天成四年夏五月戶部三京鄴都諸道州府逐年所徵夏秋稅租兼鹽麩折徵諸般錢穀起徵各視其地節候早晚分立限期其月勅百姓今年夏苗委人戶自通供手狀具頃畝多少五家爲保委無隱漏攢連狀本州具狀送省州縣不得迭差人檢括如人戶隱欺許合陳告其田倍令并徵

長興二年夏六月勅委諸道觀察使屬縣於每村定有力人戶充村長村人議有力人戶出剩田苗補貧下不追肯者卽具狀徵收有詞者卽排段檢括自今年起爲定額有經災沴及逐年逋處不在此限

長興三年冬十二月二司奏請諸道上供稅物充兵士衣賜不足其天下所納斛斗及錢除支贍外請依時折納綾羅絹帛從之

昇元三年春正月丙申詔曰比者干戈相接人無定主地蕪而不藝桑隕而弗蠶衣食日耗朕甚憫之其嚮風面南者有司計口給食願耕種者授之士田仍復三歲租役於噶仁不異遠化無泄邇其務宣流以稱朕意其年夏四月癸未大赦境內百官進位將士勞賜有差民二年藝桑及

三千本者賜帛五十匹每丁墾田及八十畝者賜錢二萬
皆五年勿收租稅又是時田每十畝蠲一畝半以充瘠薄
昇元五年冬十一月定民田稅分遣使者按行民田以肥
瘠定其稅民間稱爲平允自時江淮調兵興役及他賦斂
皆以稅錢爲率

後主元年夏六月罷諸路屯田使委所屬令與常賦俱徵
隨所租入十分錫一謂之率分以爲廩祿諸朱膠牙稅視
是初屯田置使專掌至是罷其官而屯田佃民絕公吏之
擾

同光二年春二月詔曰會計之重鹽鹺居先矧彼兩池實
有豐利頃自兵戈擾攘民庶流離旣場務以墮殘致程課
之虧失重茲葺理須仗規模將立事以成功在從長而就
便宜令河中節度使冀王李繼麟兼充制置安邑解縣兩
池權鹽使仍委便置一一條貫

同米三年春二月勅魏府每年所徵隨絲鹽錢每兩與減
放五文逐年裒賣蠶鹽食鹽大鹽甜次冷鹽每斗與減五
十樂鹽與減三十

天成元年夏四月勅諸州府百姓令散蠶鹽今後每年祇
二月內一度裒散依夏稅限納錢

長興四年夏五月七日諸道鹽鐵轉運使奏諸道州府鹽

法條流元末一槩定奪謹具如後 應食顆鹽州府省司
各置權糶折博場院應是鄉村竝通私商與販所有折博
竝每年人戶蠶鹽竝不許將帶一斤一兩入城侵奪權糶
課利如違犯者一兩以上至一斤買賣人各杖六十一斤
以上至三斤買賣人各杖七十三斤以上至五斤買賣人
各杖八十五斤以上至十斤買賣人各徒二年十斤以上
不計多少買賣人各決脊杖二十處死所有犯鹽人隨行
錢物驢畜等竝納人官所有元本家業田莊如是全家逃
走者卽行點納仍許般載脚戶經過店主竝脚下人力等
糾告等第支與優給如知情不告與賣鹽人同罪其犯鹽

人經過處地分門司廂界巡檢節級所由諸色關連人等
不專覺察委本州臨時斷訖報省如是門司關津口捕捉
獲私鹽依下項等第一半賞錢十斤以上至五十斤支賞
錢二十千五十斤已上至一百斤支賞錢三十千一百斤
已上支賞錢五十千 應食末鹽地界州府縣鎮竝有權
糶場院久來內外禁法卽未一概條流應刮鹹煎鹽不計
多少斤兩竝處極法兼許四鄰及諸色人等陳告等第支
給賞錢欲指揮此後犯一兩已上至一斤買賣人各杖六
十一斤已上至二斤買賣人各杖七十二斤已上至三斤
買賣人各徒一年三斤已上至五斤買賣人各徒二年五

續唐書卷二十一
斤已上買賣人各決脊杖處死如是收到鹹土鹽水卽委本處煎鍊鹽數準條科斷或有已會違犯不至死刑經斷後公然不懼條流再犯者不計斤兩多少所犯人竝處極法其有權糶場院員寮節級人力煎鹽池客竈戶般鹽船綱押綱軍將衙官梢工等具知鹽法如有公然偷盜官鹽或將貨賣其買賣人及窩盤主人知情不告竝依前項刮鹹例五斤已上處死其諸色關連人等竝合支賞錢卽準京洛諸鎮條流事例施行 顆末青白等鹽元不許界分參雜其顆鹽先許通商之時指揮不得將帶入末鹽地界如有違犯一斤一兩竝處極法所有隨行物色除鹽外一

半納官一半與捉事人充賞其餘鹽色未有畫一條流其洛州并鎮定邢州管內多北京末鹽入界捉獲竝依洛京條流科斷欲指揮此後但是顆末青白諸色鹽侵界參雜捉獲竝準京洛條流施行 一應諸道今後若捉獲犯私鹽麴人罪犯分明正該條法便仰斷遣訖奏若稍涉疑誤祇須申奏取裁

天成三年秋七月詔曰應三京鄴都及諸道州府鄉村人戶自今年七月後於是秋田苗上每畝納麴錢五文足陌一任百姓自造私麴醞酒供家其錢隨夏秋徵納其京都及諸道府縣鎮坊界內應逐年買官麴酒戶便許自造麴

醞酒貨賣仍取天成二年正月至年終一年逐戶計算都
買麴錢數內十分只納二分以充權酒錢便從今年七月
後管數徵納權酒戶外其餘諸色人亦許私造麴酒供家
卽不得衷私賣酒如有故違便卽糾察勒依中等酒戶納
權其坊村一任沽賣不在納權之限循以麴法殺一家於
洛陽或獻此以爲愛其人便於國故行之

長興元年春二月赦書節文諸道州府人戶每秋苗一畝
上元徵麴錢五文今後特放二文只徵三文

長興二年夏五月丁卯詔曰酒醴所重麴蘖是須緣賣價
太高禁條頗峻士庶因斯而抵犯刑名由是以滋彰爰行

改革之文庶息煩苛之政各隨苗量定稅錢訪聞數年以
來雖犯法者稀而傷民益甚蓋以亂離日久貧下戶多纔
遇昇平便勤稼穡各務耕田鑿井孰能枕麴藉糠旣隨例
以均攤遂抱虛而輸納遂成凋弊深可憫傷況欲致豐財
必除時病有利之事方切施行無名之求尤宜廢罷但得
日新之理何辭夕改之嫌應在京諸道苗畝上所徵麴錢
等便從今年夏並放其麴官中自委逐州減價一半於在
城撲斷貨賣除在城諸人不准私造外鄉村人戶或要供
家一任私造勅下之日人甚悅之其年秋七月三司奏先
許百姓造麴不來官場收買伏恐課額不逮請復以前麴

法鄉戶與在城條法一例指揮仍據已造到麴納官量支還麥本從之

長興二年冬十一月甲寅朔詔開鐵禁許百姓自鑄農器什器之屬於夏秋田畝上每畝輸納農器錢一錢五分同光二年度支奏請勅示府州縣鎮軍民商旅凡有買賣須使八十陌錢二月詔曰錢者卽古之泉布蓋取其流行天下布散人間無積滯則交易通多貯藏則士農困故西漢興改幣之制立告緡之條所以權蓄賈而防大姦也宜令所司散下州府常須檢察不得令富室分外收貯又工人銷鑄爲銅器兼沿邊州鎮設法鈐轄勿令商人般載出

境其年三月知唐州晏駢安奏市肆間點檢錢帛內有錫鑊小錢揀得不少皆是江南綱商挾帶而來詔曰帛布之幣雜以鉛錫惟是江湖之外盜鑄尤多市肆之間公行無畏因是綱商挾帶舟楫往來換易好錢藏貯富室實爲蠹弊須有條流宜令京城諸道於坊市行使錢內點檢雜惡鉛錫錢竝宜禁斷沿江州縣每有舟船到岸嚴加覺察不許將雜鉛錫惡錢往來換易好錢如有私載竝行收納天成元年秋八月中書門下奏訪聞近日諸道州府所賣器價貴多是銷鎔見錢以邀厚利乃下詔曰宜令徧行曉告如原係銅器及碎銅卽許鑄造仍令生銅器物每斤價

定二百文熟銅器物每斤四百文如違省價買賣之人依盜鑄錢律文科斷

清泰二年冬十二月詔御史臺曉告中外禁用鉛錢如違犯準條流處分

江南因唐舊制饒州置永平監歲鑄錢池州永寧監建州永豐監並歲鑄錢杭州置保興監鑄錢

交泰二年秋七月用鍾謨言鑄大錢以一當十文曰永通錢貨右文曰貨左文曰泉與舊錢並行已又鑄唐國通寶錢二當開元錢之一又鑄大唐通寶錢與唐國錢通用數年漸敝百姓盜鑄極爲輕小

後主三年春三月始鑄錢其錢之大小如開元通寶徐鉉篆其文每十錢以鐵錢六權銅錢四而行逮民間止用鐵錢遂藏銅錢靳弗出末年銅錢一直鐵錢十比國亡諸郡所積銅錢累十七萬緡初嗣主鑄唐國錢其文曰唐國通寶約一千重三斤十二兩至數年而弊生百姓盜鑄僅止一斤置水上不沈雖嚴禁不止至是有鐵錢之議旣行至數年物價漸增諸郡盜鑄者頗多而輕小環外芒刺不及官場圓淨國家雖以法繩之犯者配遠郡民罹之益衆而不止

續唐書卷二十一終

續唐書卷二十一

海昌陳鱣誤

武林姜安
長水祝恂 全校

刑法志

唐之律書因隋之制用齊律十二篇舊名一曰名例二曰
衛禁三曰職制四曰戶婚五曰廩庫六曰擅興七曰盜賊
八曰鬪訟九曰詐僞十曰雜律十一曰捕亡十二曰斷獄
其制刑名五一曰死乃古大辟之刑也二曰流書云流宥
五刑謂不忍殺戮而宥之於遠三曰徒徒者奴也蓋奴辱
之周禮云其奴男子入於罪隸任之以事置之園土而教
之量其罪之輕重有年數而舍之四曰杖杖者持也可持

以擊也五日笞笞之爲言恥也凡過之小者捶撻以恥之漢用竹後世更以楚書曰仆作教刑是也自隋以前死刑有五曰罄絞斬梟裂而流徒之刑鞭笞兼用數皆踰百至隋始定死刑爲二曰斬曰絞除其梟首輾裂之酷流徒各除其鞭刑唐皆因之及至僞梁篡位妄自更張重刑定律三十卷格十卷式二十卷目錄十三卷律疏三十卷凡五部共一百三篇目爲新定格式律令皆係贖貨濫刑刪改舊制莊宗滅梁之歲卽勅臣下纂集同光刑律統類凡一十三卷俱合唐朝舊制庶刑令式有所遵循爰約述其詔勅云

同光元年冬十二月御史奏當司刑部大理寺本朝法書自朱溫僭逆刪改字條或重貨財輕入人命或自徇枉過濫加刑罰今見在三司收貯刑書並是僞廷刪改者兼僞廷先下諸道追取本朝法書焚燬或經兵火所遺皆無舊本節目只定州勅庫有本朝法書具在請勅定州節度使速寫副本進納庶刑法令式竝合本朝舊制從之未幾定州王都進納唐朝格式律令凡二百八十六卷

同光二年春二月刑部尙書盧損奏纂集同光刑律統類凡一十三卷上之

同光二年夏六月己巳勅應御史臺河南府行臺馬步司

續唐書卷二十一
左右軍巡院見禁囚徒據罪輕重限十日內竝須決遣申
奏仍委四京諸道府見禁囚徒宜疏決不得淹滯兼恐內
外刑勢官員私自寄禁切要止絕俾無冤滯

同光三年夏五月己未勅三京諸道府所禁罪人如無
大過速令疏決不得淹滯六月甲寅勅刑以秋冬雖關惻
隱罪多連累翻慮滯淹若或十人之中止爲一夫抵死豈
可以輕附重禁錮逾時言念哀矜又難全廢其諸司囚徒
罪無輕重竝宜各委本司據罪詳斷申奏輕者卽時疏理
重者候過立春至秋分後然後行法如是事繫軍機須行
嚴令或謀惡逆或蓄奸邪或行劫殺人難於留滯竝不在

此限

天成元年冬十一月庚申勅應天下州使繫囚除大辟罪
以上委所在長吏速推勘決斷不得旁追證對經過食宿
之地除當死刑外竝仰釋放兼不許懲治

天成二年春正月戊辰左拾遺李同上言天下繫囚請委
長吏逐旬親自引問質其罪狀真虛然後論之以法庶無
枉濫從之夏六月辛卯大理少卿王鬱上言凡決極刑合
三覆奏近年以來全不守此伏乞今後前一日令各一覆
奏奉勅宜依八月西京奏奉近勅在京犯極刑者令決前
一日各一覆奏緣當府地遠此後凡有極刑不審準條疏

續唐書卷二十一
覆奏奉勅旨昨六月二十日所降勅文祇爲應在洛京有
犯極刑者覆奏其諸道已降旨命準舊例施行今詳西京
所奏尙未明近勅兼慮諸道有此疑惑政令曉諭冬十月
辛丑德音爲政之要切在無私聽訟之方惟期不濫天下
諸州官員如有善推疑獄及會雪濫冤兼有異政者當具
姓名聞奏別加甄獎

長興元年春二月詔曰欲通和氣必在伸冤將設公方實
資獎善州縣官僚能雪冤獄活人生命者許非時選仍加
階超資注官與轉服色已著緋者與轉兼官

長興二年春二月辛亥勅朕猥以眇躬薦承洪業念彼疲

瘵勞於寐興或慮官不得人因成紊亂或慮刑非其罪遂
至怨嗟王化所興獄訟爲本苟無訓勵必有滯淹近日諸
道百姓或諸多違犯或小有鬪爭官吏曲縱胥徒巧求瑕
釁初則滋張節目作法拘囚終乃誅剝貨財市恩出拔外
憑公道內徇私情無理者轉務遷延有理者却思退縮積
成訛弊漸失紀綱自今後切委逐處官吏州牧縣宰等深
體余懷各舉爾職凡關推究速與剴裁如敢苟縱依違致
成枉濫或經臺訴屈或投匭伸冤勘問不虛其原推官典
竝當責罰其逐處觀察使刺史別議朝典宜令諸道州府
各依此處分所管屬郡委本道嚴切指揮夏五月癸丑詔

有司及天下州縣於律令格式六典中錄本局公事書於廳壁令其遵行六月壬午詔天下州府斷獄先於案牘之上坐所該律令格式及新勅然後處分八月丁卯勅三京諸道州府刑獄近日訪聞依前禁繫人多不旋決諸道宜令所在各委長吏專切推窮不得復有淹滯四月初濮州錄事參軍崔琮上言諸道獄囚恐不依法拷掠或不勝苦致斃翻以病聞請置病囚院兼加醫藥中書覆云有罪當刑仰天無恨無病致斃沒地埋冤燃死灰而必在至仁照覆盆而須資異鑑書著欽哉之旨禮標侷也之文因彭善於泣辜更推恩於扇暘所謂置病囚院望依仍各委長吏專切經心或有病囚當時遣醫人診候治療後據所犯輕重決斷如敢故違致病囚負屈身亡本處官吏竝加嚴斷每至五日一度差人洗刷枷匣

長興三年春正月戊申大理正張居瑑上言所頒諸州新定格式律令請委逐處各差法直官一人專掌檢討從之應順元年春二月戊午詔應三京諸道州府繫囚據罪輕重疾速斷遣比來停滯須奏取裁不便區分故爲留滯今後凡有刑獄據理斷遣如有勅推按理合奏聞不在此限清泰元年夏五月丁丑詔在京諸獄及天下州府見繫罪人正當暑毒之時未免拘囚之苦誠知負罪特軫予懷恐

法吏生情滯於決斷詔至所在長吏親自慮輕重疾速斷遣無淹滯

清泰二年春正月乙巳中書門下奏遇千春節凡刑獄公事奏覆候次月施行今後請重繫者即候次月輕繫者即節前奏覆決遣從之

昇元六年秋九月庚寅頒昇元刪定條列祖自為吳相興利除害變更舊法甚多及即位命法官及尚書刪定為昇元條二十卷至是行之

續唐書卷二十一終

續唐書卷二十二

海昌陳鱣謨

武林姜安長水祝恂全校

岐世家第一

李茂貞深州博野人也本姓宋名文通祖鐸父端乾符中文通為博野軍卒黃巢犯闕鄭畋以博野軍遣其擊賊以功自隊長遷軍校光啓元年朱玫反僖宗出居興元玫遣王行瑜攻大散關文通敗之於大唐峯明年玫遂敗死文通以功自扈蹕都頭拜武定軍節度使賜姓李名茂貞僖宗親為製字曰正臣扈蹕東歸李昌符擁兵於岐下遣茂貞追擊殺昌符以功拜鳳翔隴右節度使大順元年封隴

續唐書卷二十二
西郡王二年樞密使楊復恭得罪奔山南與楊守亮據興元叛茂貞與王行瑜討平之詔以宰相徐元若鎮興元茂貞違詔表其假子繼徽爲留後堅請旄鉞昭宗不得已而授之自是茂貞恃勳恣橫擅兵窺伺頗干朝政昭宗不勝其逼欲加討伐乾寧初命宰相杜讓能調發軍旅師未越境爲茂貞所敗茂貞乘勝進屯三橋京師大震士庶奔散天子乃誅兩樞密以謝之茂貞嚴兵不解抗言讓能之罪誅之方罷於是貶讓能雷州司戶參軍賜死茂貞乃罷兵及韋昭度李谿爲相茂貞聽邪說復沮其事詔報曰軍旅之事吾則與藩臣圖之朝廷命相出自朕懷又請授王珙

河中節度使詔報曰太原表先至已許王珂不可追改乾寧二年五月茂貞與王行瑜韓建稱兵入覲京師震恐天子御樓待之抗表請殺宰相韋昭度李谿以謝天下移王珙於河中旣還留其假子繼鵬宿衛卽閻珪也時武皇上表請討三鎮以寧關輔是歲七月太原之師至河中繼鵬與行瑜弟行實等爭劫昭宗出奔京師大亂昭宗出居於石門是月武皇至渭北遣副使王瓌奉表行在昭宗以武皇爲行營都御史進討邠岐茂貞懼斬繼鵬繼晟上表待罪昭宗原之武皇曰不誅茂貞關輔無由寧謐時附茂貞者奏云若太原盡殄邠岐必入關輔京師憂未艾也乃詔

武皇與茂貞和及行瑜誅武皇班師茂貞怨望驕橫如故
明年五月制授茂貞東川節度使仍命通王覃王治禁軍
於闕下如茂貞違詔卽討之茂貞懼將赴鎮王師至興平
夜自驚潰茂貞因出乘之官軍大敗車駕倉猝出幸華州
茂貞之衆因犯京師焚燒官室大掠坊市自此長安大內
盡爲兵墟矣四年昭宗復命宰臣孫偓統軍進討韓建諫
止令茂貞上章請雪光化中加茂貞尙書令封岐王令其
子繼筠以兵宿衛天復元年十月朱全忠攻同華勢逼京
師十一月六日繼筠與中尉韓全誨劫昭宗幸鳳翔茂貞
遂與全誨矯詔徵兵天下將討全忠宰相崔胤召全忠引

四鎮之兵屯於岐下重溝復壘逾年茂貞每戰輒敗閉壁
不敢出城中薪食俱盡自冬及春雨雪不止民凍餓死者
日以千數米斗直錢七千至燒人屎煮尸而食父自食其
子人有爭其肉者曰此吾子也汝安得而食之人肉斤直
錢百狗肉斤直錢五百父甘食其子而人肉賤於狗天子
於官中設小磨遣官人自屑豆麥以供御自後宮諸王十
六宅凍餒而死者日三四城中相與邀遮茂貞求路以爲
生茂貞窮迫謀以天子與梁以爲解昭宗謂茂貞曰朕與
六官一日食粥一日食不托安能不與梁和乎時茂貞山
南諸州盡爲王建所陷涇原秦隴邠鄜延夏皆降於梁茂

貞獨據孤城內外援絕正月乃請車駕還京與梁約和斬
韓全誨等二十餘人傳首梁軍梁圍乃解天子雖得出然
梁遂劫東遷而唐亡茂貞非惟亡唐亦自困矣茂貞懼梁
復討請落尙書令許之及全忠篡位諸侯之彊者皆相次
稱帝獨茂貞不敢乃與王建會兵於太原志圖與復竟無
成功茂貞疆土危蹙不遂僭竊之志但開岐王府置官屬
日妻爲皇后鳴鞘常扇視朝宣令一如王尙行昭宗之正
朔焉茂貞居岐以寬仁愛物民頗安之嘗以地狹賦薄下
令推油因禁城門無納松薪以其可爲炬也有優者誚之
曰臣請并禁明月茂貞笑而不怒初茂貞破楊守亮取興

元而邠寧鄜坊皆附之其地有岐隴涇原渭武秦成階鳳
邠寧慶衍鄜坊丹延梁洋凡二十州其被梁圍興元入於
蜀天祐四年已後邠寧鄜坊入於梁秦鳳階成又入於蜀
至天祐十九年間所有七州而已茂貞鼠形多智數軍旅
之事一經耳目無忘之者性至寬有部將符昭者人或告
其謀變茂貞親至其家去其爪牙熟寢經宿而還軍士有
鬪而訴者茂貞曰喫令公一碗不托與爾和解遂致上下
服之尤善事母母終哀毀幾滅性聞者嘉之但御軍整衆
都無紀律當食則造庖廚往往席地而坐內外持管鑰者
亦呼爲司空太保與夫細柳大樹之威名蓋相去遠矣莊

宗已破梁茂貞稱岐王上賤賀之以季父行自處及聞入洛懼不自安乃上表稱臣尋遣其子從曦來朝莊宗詔茂貞仍舊官進封秦王所賜詔勅不名又以其宿望者年特加優禮及疾篤遣中使賜醫藥問訊同光二年夏四月薨年六十九謚曰忠敬子從曦嗣

從曦茂貞之長子也天復中自秦王府行軍司馬檢校太傅出爲涇州兩使留後茂貞承制拜彰義軍節度使及莊宗平梁茂貞令從曦入覲加兼中書令俄而茂貞薨拜鳳翔節度使同光三年九月以魏王繼岌伐蜀詔充供軍轉運應接使四年正月蜀平繼岌命部署王衍一行東下至

岐監軍使柴從厚不與符印促令赴闕從曦至華下聞莊宗之難歸鎮明宗入立詔誅從厚從曦以軍民不擾從厚之力也上表論救時議嘉之天成元年五月制落復起加檢校太師其年九月敕曰李從曦等世聯宗屬任重藩宣慶善有稱忠勤甚著旣預維城之列宜新定體之文是降寵光以隆惇敘俾煥成家之美貴從猶子之規宜於曦祖照上稱從自長興元年明宗有事於南郊從曦入覲禮畢移鎮汴州四年復入覲改天平軍節度使及末帝起兵於岐盡取從曦家財器仗以助軍需末帝離岐吏民扣馬乞以從曦爲帥許之清泰初卽以從曦復爲鳳翔節度使仍

續唐書卷二十二
封秦國公保大四年冬卒於鎮年四十有九從曦少敏悟
善筆札工畫性柔和無節操當莊宗新有天下因人覲獻
寶裝針珥於皇后時以爲佞但進退閒雅慕士大夫之所
爲有請謁者無賢不肖皆盡其敬以其昆仲間第六官至
中書令世謂之六令公鎮於岐山前後二紀每花繁月朗
必陳勝會以賞之客有困於酒者雖吐茵墮幘而無厭色
左右或有過未嘗笞責先人汧隴之間有田千頃竹千畝
恐奪民利不令理之致岐陽父老再陳借寇之言良有以
也子永吉歷數鎮行軍司馬

京師遂致天子蒙塵諸王餓孳厥罪大矣惟其志在滅梁
奉唐正朔始終不改及莊宗入洛奉表稱臣鎮於岐下再
世相承以諸國類推何遽非荆南之匹舊史列於世襲傳
首是矣新修史記十國世家進南平而舍岐豈非不平之
事哉今特著爲世家書首

續唐書卷二十一終

續唐書卷二十三

海昌陳鱣謨

武林姜安
長水祝恂全校

吳世家第二

楊行密字化源廬州合肥人也父名怱世爲農家初名行
愍少孤貧爲人長大有力能手舉三百斤日行三百里唐
中和之亂天子幸蜀郡將遣行密徒步奏事如期而復光
啓初秦宗權擾淮右頻寇廬壽郡將募能致戰擒賊者計
級賞之行密以膽力應募往必有獲得補爲隊長乃自募
百餘人皆悍勇無行者殺都州將自權州兵郡將卽以符
印付之而去朝廷因正授行密廬州刺史光啓三年揚州

節度使高駢失政委任妖人呂用之輩牙將畢師鐸懼爲用之所譖自高郵起兵以襲廣陵爲用之所却乃乞師於宣州秦彥彥先遣將秦稠以兵三千人助師鐸攻陷廣陵高駢署師鐸爲行軍司馬未幾彥率大衆并家屬渡江入揚州軍府自稱節度使初揚州未陷呂用之詐爲高駢檄徵兵於廬州及城陷行密以萬人奄至畢師鐸之入廣陵也呂用之出奔於外至是委質於行密行密攻廣陵營於大明寺秦畢出兵以攻行密之營短兵纔接行密僞遁秦畢之兵爭入其柵以取金帛行密發伏兵以擊之秦畢大敗退走不敢出戰其年九月秦畢害高駢於幽所少長皆

死行密攻圍彌急城中食盡米斗四十千居人相啗略盡十月城陷秦畢居東塘行密入廣陵輦外寨之粟以食居民卽日米價減至三千十一月蔡賊孫儒以衆萬人自淮西奄至還據外寨行密輜重牛羊軍食未入城者皆爲儒所有秦畢來自東塘與儒軍合白是西門之外復爲敵境矣初呂用之遇行密於天長給行密曰用之有白金五十錠瘞於所居之廡下寇平之日願備將士倡樓一醉之資至是行密閱兵用之在側謂用之曰僕射許此輩銀何負心也遽命斬於三橋之下夷其族行密既有廣陵遣使至梁陳歸附之意是時朱全忠兼領淮南乃遣牙將張廷範

至淮南與行密結盟尋遣行軍司馬李璠權知淮南留後令都將郭言以兵援送行密初則厚禮廷範及聞李璠之行勃然有拒命之意廷範懼易衣夜遁遇全忠於宋州備言行密不軌之心酌其兵勢未可圖也乃追李璠等還卽表行密爲淮南留後文德元年正月孫儒殺秦彥畢師鐸於高郵引軍襲廣陵下之儒自稱節度使行密收其衆歸於廬江十一月全忠遣大將龐師古自潁上渡淮討孫儒之亂師古引兵深入淮甸不利還龍紀元年孫儒出攻宣州行密乘虛襲據揚州北通時溥孫儒引軍復攻行密大順元年行密危蹙率衆夜遁出據宣州孫儒復入揚州二

年乃蒐練兵甲以攻行密屬江淮疾疫師人多死儒亦臥病爲部下所執送於行密殺之行密自宣城長驅入於廣陵盡得孫儒之衆乃招合離散與民休息政事寬簡百姓便之蒐兵練將選五千人參養於府第甲冑皆以黑繪飾之命曰黑雲都乾寧二年行密盡有淮南之地昭宗降制授爲淮南節度使加檢校太傅同中書門下平章事四年全忠平兗鄆朱瑾及沙陀將李承嗣史儼等皆奔淮南行密任以爲將是歲行密縱兵侵掠鄰部兩浙錢鏐江西鍾傳鄂州杜洪皆遣使求救於全忠全忠遣朱友恭討伐行密先令都將翟章據黃州及友恭師至卽棄郡南渡固守

續通志卷二十三
武昌寨行密遣將馬珣以精兵五千助之友恭與杜洪大破其衆遂拔武昌寨擒翟章并淮軍三千餘人淮人大恐八月全忠葛從周龐師古攻行密壽州行密敗之於清江口殺師古從周收兵走追至潁河又大敗之光化二年行密北侵遣張歸厚禦之而退天復二年昭宗在岐遣江淮宣諭使李儼拜行密東南行營諸道行營都統檢校太師中書令封吳王三年青州王師範叛來乞師行密遣將王茂章出救之大敗之殺朱友寧友寧全忠之子也全忠大怒自將以擊之兵號二十萬復爲茂章所敗天祐元年十一月淮人攻光州全忠率軍抵霍邱略地於廬壽之境淮

人遁去二年正月進攻壽州淮人閉壁不出大掠而還是月行密攻陷鄂州擒杜洪斬於揚州市全忠之戍兵數千人亦陷焉其後江西鍾傳宣州田頴俱爲行密所并二年十一月庚辰行密以疾卒於廣陵年五十四謚曰忠武子渥立溥僭號追尊爲太祖武皇帝陵曰興陵

渥字承天行密長子也行密病出渥爲宣州觀察使徐溫私謂渥曰今王有疾而出嫡嗣必有姦臣之謀若他日召子非溫使者慎無應命渥泣謝而去行密病甚命判官周隱作符召渥隱慮渥幼弱不任事勸行密用舊日有威望者乃薦大將劉威行密未許溫與嚴可求入問疾行密以

通鑑卷之二十三
四
隱議告之温等大驚遽詣隱所計事隱未出而温見隱作
召符猶在案上急取遣之渥見温使者乃行行密卒渥嗣
立召隱罵曰汝欲賣吾國者復何面目見楊氏乎遂殺之
以王茂章爲宣州觀察使渥之入也多輦宣州庫物以歸
廣陵茂章惜而不與渥怒以兵圍之茂章奔於錢唐天祐
三年二月劉存取岳州四月江西鍾傳卒其子匡時代立
傳養子延規怨不得立以兵攻匡時渥遣秦裴率兵攻之
九月克洪州執匡時及其司馬陳象以歸斬象於市赦匡
時以秦裴爲江西制置使全忠篡唐國號梁改元開平渥
仍稱天祐渥之入廣陵也留帳下兵於宣州以其腹心陳

璠范遇將之旣入立惡徐温典牙兵召璠等爲東院馬軍
以自衛而温與左衙都指揮使張顥皆行密時舊將又有
立渥之功共惡璠等侵其權天祐四年正月渥視事璠等
侍側温顥擁牙兵入拽璠等下斬之渥不能止由是失政
而心憤未能發温等益不自安天祐五年温顥共遣盜入
寢中執渥縊殺之時年二十三謚曰景弟渭立及僭號追
尊爲烈祖景皇帝陵曰紹陵

渭字鴻源行密第二子也初名瀛又名隆演先是張顥徐
温之弑渥也謀分地送欵於梁及渥死顥欲自立温患之
問其客嚴可求可求曰顥雖剛愎而闇於成事此易爲也

續通志卷二十三
五
明日顥列戟於府中召諸將議事自大將朱瑾而下皆去
衛從然後入顥問諸將誰當立者諸將莫可對顥三問可
求前密啓曰方今四境多虞非公主之不可然在今日劉
威陶雅李簡李遇皆先王一等人也公雖自立此輩能降
心以事否不若立幼主輔之爲便顥不能荅可求因趨出
書一教內袖中諸將莫知所爲及出教宣之乃渥母史氏
教言楊氏創業艱難而嗣王不幸渭以次當立諸將毋負
楊氏而善事之間者感動顥氣色皆沮卒無能爲渭乃得
立顥由此與溫有隙諷渭出溫潤州可求復以計留溫行
軍副使李承嗣與顥善覺可求有附溫意諷顥使客夜刺

殺之客刺可求不中明日可求詣溫謀先殺顥陰遣鍾章
選壯士三十人就牙堂斬顥因以弑渥之罪歸之溫由是
專政渭備位而已天祐六年六月撫州危全諷叛攻洪州
袁州彭彥章吉州彭玕信州危仔倡皆起兵叛可求薦周
本本請兵七千戰於象牙潭敗之執全諷彥章而玕奔於
楚仔倡奔於錢唐全諷至廣陵諸將議曰昔先王攻趙鎰
全諷屢饒給吳軍乃釋不殺天祐七年春二月萬全感自
岐歸岐王承制加渭兼中書令天祐八年徐溫領昇州刺
史治舟師於金陵宣州李遇憤溫用事嘗曰徐溫何人而
驟至此溫聞之怒遣柴再用以兵送王壇代遇且召之遇

疑不受命再用圍之渭使客將何羨諭遇使自歸乃隨羨
出溫諷再用伺其出殺之并族其家天祐九年七月溫率
將吏進渭位太師中書令吳王以溫爲行軍司馬鎮海軍
節度使同中書門下平章事陳章攻楚取岳州執其刺史
苑玫天祐十年九月吳越遣其子傳瓘攻常州屯於潘葑
徐溫敗之於無錫梁遣王茂章攻壽春溫敗之於霍邱天
祐十一年夏四月袁州刺史劉崇景叛附於楚楚將許貞
來援渭遣柴再用等大破之復取袁州天祐十二年秋八
月以溫爲兩浙都招討使封齊國公鎮潤州留其子知訓
爲行軍副使秉政而大事溫遙決之冬濬林江水中出火

可以然物天祐十二年宿衛將李球馬謙劫渭登樓發庫
兵以誅知訓知訓將出走適朱瑾自外來反顧一麾外兵
爭進斬球謙而亂兵皆潰天祐十四年徐溫徙治金陵天
祐十五年夏四月副都統朱瑾殺徐知訓瑾自殺潤州烈
祖聞亂率兵入殺唐宣諭使李儼以止亂遂秉政戊戌烈
祖遷淮南節度行軍副使以徐知諫代權潤州團練事天
祐十六年春二月溫率將吏請渭卽天子位不許夏四月
溫奉玉冊寶綬尊渭卽吳王位建宗廟社稷設百官如天
子制改天祐十六年爲武義元年大赦境內追尊先代文
武百官以次進位封宗室皆郡公溫之徙鎮金陵也以烈

續唐書卷二十三
祖守潤州嚴可求謂之曰二郎君非徐氏子而推賢下士人望頗歸若不去之恐爲後患温不能用其言及列祖秉政其語泄列祖出可求於楚可求懼詣金陵見温謀曰唐亡於今十二年而吳猶不敢改天祐可謂不負唐矣然吳所以征伐四方而建基業者常以復興爲辭今聞河上之戰梁兵屢絀若李氏復興其能屈節乎宜於此時先建國以自立温深然之因留可求不遣方謀迫渭僭號二年五月己丑渭卒渭少年嗣位權在徐氏及建國稱制非其本意常怏怏酣飲稀復進食遂至疾卒年二十四謚曰宣弟溥立溥僭號追尊爲高祖宣皇帝陵曰肅陵

溥行密第四子也初封丹陽郡公渭卒徐温推溥爲主六月戊申卽吳王位秋七月改昇州大都督府爲金陵府拜温金陵尹明年春正月遣使勸晉王稱帝改元順義大赦境內冬十月甲子祀天於南郊拜徐温太師嚴可求右僕射同光元年莊宗平梁遷都於洛陽十二月溥遣使景章入朝稱大吳國主致書上大唐皇帝其辭旨卑遜有同賤表明年八月又遣司農卿盧蘋貢方物及獻貞太后珍玩莊宗命左藏庫使王居敏通事舍人張朗等以名馬報之郭崇韜之平西川也淮人大懼將去僞號稱藩於唐時崇韜欲陳舟師下峽爲平吳之策會崇韜旣誅洛城有變淮

人聞之比屋相慶同光四年四月莊宗崩五月丁卯詔爲同光主輟朝七日冬十月辛丑徐溫卒十一月庚戌溥御文明殿卽皇帝位改元曰乾貞追封溫爲齊王吳乾貞二年二月庚辰遣通事舍人劉朝忠入朝修好安重誨奏曰楊溥旣不稱藩無足與之抗禮來偵國情不如辭絕乃謝其使不受所供遣之六月辛巳南平王高季興來附封季興秦王天成四年吳太和元年九月溥加尊號曰睿聖文明光孝皇帝大赦境內改元曰太和十二月加烈祖中書令清泰元年吳太和六年九月溥加尊號曰睿聖文明光孝應天宏道廣德皇帝丙申大赦改太和七年爲天祚元

年烈祖進位太師天下兵馬大元帥封齊王清泰二年吳天祚元年冬十一月丁酉契丹立石敬瑭稱帝於柳林國號晉十二月辛丑唐安遠節度使盧文進棄鎮來奔明年烈祖建齊國立宗廟社稷置左右丞相已下以金陵爲西都廣陵爲東都冬十月溥遣江夏王璘奉冊禪位於齊昇元二年十二月溥殂於丹陽年二十八烈祖廢朝二十七日追謚曰睿葬平陵昇元六年遷其子孫於海陵號永安宮嚴兵守之絕不通人保大十四年元宗遣園苑使尹廷範迎置京口時道路已亂廷範慮有變執其二弟六十餘人殺之以其婦女渡江元宗大怒腰斬廷範楊氏遂絕

述曰三十六英雄行密居最五國故事載行密豪勇而頗有度量吳越蘇州刺史成及爲部所叛執送行密行密舍之了無疑忌及常抵內室見行密方起盥漱右手擎一沙羅可百餘兩水滿其中而洗其頂則力舉三百斤不謬矣史又言其爲人寬仁雅信能得士心卒之開國淮南稱雄四主況其初奉天祐年號者一十二年志亦可嘉故次於岐世家後焉

續唐書卷二十三終

續唐書卷二十四

海昌陳鱣謨

武林姜安
長水祝恂全校

梁世家第三

朱全忠本名温宋州碭山人也父誠生三子曰全昱存全忠其季誠卒三子貧不能爲生與其母傭食蕭縣人劉崇家全昱無他材存及全忠有勇力乾符四年黃巢起曹濮存全忠亡入賊中巢攻嶺南存戰死巢陷京師以全忠爲東面行營先鋒使攻陷同州以爲同州防禦使是時僖宗在蜀諸鎮會兵討賊全忠數爲河中王重榮所敗屢請益兵巢不從全忠乃殺其監軍嚴實自歸於河中因王重榮

以降都統王鐸承制拜全忠左金吾衛大將軍河中行營
招討副使僖宗賜溫名全忠中和三年三月拜全忠汴州
刺史宣武軍節度使四月諸鎮兵破巢復京師巢走藍田
七月丁卯全忠歸於宣武是歲巢出藍田關陷蔡州節度
使秦宗權叛附於巢遂圍陳州徐州時溥爲東南面行營
兵馬都統會東諸鎮兵以救陳陳州刺史趙犇亦乞兵於
全忠溥雖爲都統而不親兵四年全忠乃自將救犇率諸
鎮兵擊敗巢將黃鄴尙讓等犇以全忠爲德始附屬焉是
時晉王下兵太行渡河出洛陽與東兵會擊巢巢已敗去
全忠及晉王追敗之於郟城巢走中牟又敗之於王滿巢

走封邱又大敗之巢挺身東走至泰山狼虎谷爲時溥追
兵所殺九月以全忠爲檢校司徒同平章事封沛郡侯光
啓二年三月進爵王十二月改封吳興郡王三年春二月
承制以朱珍爲淄州刺史俾募兵於東道得兵萬人馬千
匹以歸是時秦宗權稱帝遣其將秦賢軍板橋張晁軍北
郊盧瑋軍萬勝環汴爲三十六柵全忠乃親引兵攻秦賢
拔其四柵又擊瑋萬勝瑋敗投水死宗權聞瑋等敗乃自
將精兵數千柵北郊全忠以輕兵出北門襲晁遂大敗之
宗權與晁夜遁復遣晁攻汴全忠引伏兵出斷晁軍而擊
之晁大敗脫身走宗權怒斬晁而河陽陝洛之兵因各潰

去十月賜全忠紀功碑全忠帥騎巡師於濮上因破朱瑄
援師於范縣遂攻陷濮州而還十二月賜全忠鐵券及德
政碑以全忠兼淮南節度使乃表楊行密爲副使又請行
營司馬李璠爲留後文德元年全忠率師赴淮南行次宋
州聞行密已拔揚州遂還二月丙戌全忠爲蔡州四面行
營都統三月庚子僖宗崩昭宗卽位四月戊辰魏博樂彥
貞失律其子從訓乞師於全忠乃遣朱珍攻之魏軍殺彥
貞從訓戰死魏軍立羅信乃命班師張全義逐李罕之於
河陽罕之出奔乞師於太原晉王發兵圍之全義來求救
乃遣丁謂牛存節赴之擊敗晉兵於沅河九月攻蔡不克

移兵伐徐十月遣朱珍與時溥戰於吳康大敗之取其豐
蕭二縣遂攻宿州下之龍紀元年正月龐師古敗溥於呂
梁淮西牙將申叢執秦宗權折其足別將郭璠殺叢篡宗
權來獻全忠遣送京師斬之三月封全忠東平王大順元
年春遣師古攻孫儒於淮南大敗而還六月辛酉儒遣使
修好全忠表請授儒淮南節度使辛未全忠兼宣義軍節
度使二年正月全忠與魏軍戰於內黃大敗之十月克宿
州十二月丁會敗朱瑾於金鄉景福元年二月攻鄆州前
軍朱友裕取濮州遂攻徐州二年四月師古克徐州殺時
溥全忠遂攻兗鄆乾寧元年二月全忠及朱瑄戰於魚山

大敗之二年八月又敗瑄於梁山十一月又敗之於鉅野
兗鄆求救於晉晉王發兵救之假道於魏既而魏人擊之
全忠怒大舉攻魏三年五月戰於洹水擒晉王子落落送
於魏殺之七月李茂貞犯京師天子出居於華州全忠請
以兵赴難優詔止之又請遷都洛陽不許四年正月師古
克鄆州全忠遂攻兗州朱瑾奔於淮南九月攻淮南師古
出清口楊行密遣瑾先擊清口師古敗死全忠懼馳歸光
化元年三月以全忠兼天平軍節度使四月遣葛從周攻
晉之山東取邢洛磁三州襄州趙匡凝與岐晉通七月遣
氏叔琮康懷英攻匡凝匡凝請和乃止二年四月遣氏叔

琮攻晉太原不克晉王取澤潞三年八月晉取洛州全忠
如洛州復取之是時鎮定皆附於晉遂攻鎮州破臨城進
攻定州其將王處直以定州降唐宦者劉季述作亂天子
幽於東宮天復元年正月護駕都頭孫德昭誅季述天子
復位封全忠爲梁王三月大舉攻晉五月天子以全忠兼
河中尹護國軍節度使六月晉取慈隰自劉季述等已誅
宰相崔胤外與梁交欲假梁兵盡誅宦者而李茂貞王行
瑜等皆遣精兵宿衛天子宦者韓全誨等亦陰恃以爲助
天子與胤計事宦者屬耳頗聞之乃陰令人伺察果得胤
奏謀誅宦者之說全誨等懼思圖胤以求全胤知謀泄卽

矯制召梁兵入誅宦者十月全忠以兵七萬至於河中取同州復攻華州韓建出降全誨等聞梁兵且至卽以邠岐宿衛兵劫天子奔於鳳翔全忠乃上書言胤召之之意天子怒罷胤相詔梁兵還鎮二年春全忠退兵於河中遣朱友寧擊敗晉軍於蒲縣四月友寧引兵及李茂貞戰於武功大敗之三年正月茂貞殺韓全誨等二十人囊其首以示梁軍約出天子以爲解甲天子出幸梁軍遣使馳召崔胤胤託疾不至全忠使人給之天子還至興平胤率百官奉迎全忠自爲天子執轡且泣且行見者咸以爲忠己已天子至自鳳翔殺宦者七百餘人二月甲戌賜全忠再造

竭忠守正功臣以爲諸道兵馬副元帥引兵東歸天子餞於延喜樓賜楊柳枝五曲九月遣朱友謀殺胤於京師自天子奔華州全忠請遷都洛陽雖不許而命修洛陽宮以待天祐元年正月全忠如河中遣寇彥卿如京師請遷都洛陽并徙長安居人以東天子行至陝州全忠朝於行在先如東都是時六軍諸衛兵已散亡其從以東者二百餘人全忠教醫官許昭遠告其謀亂悉殺而代之然後以聞由是左右皆梁人矣四月甲辰天子至自西都是時晉岐楚蜀吳聞梁遷天子於洛陽皆欲舉兵討梁全忠大懼六月楊崇復附於岐全忠乃以兵如河中聲言攻崇本遣朱

友恭氏叔琮等行弒昭宗崩昭宣帝嗣位十月全忠朝京師殺朱友恭氏叔琮天祐二年春二月戊戌殺德王裕等九王於九曲池六月戊子朔殺左僕射裴樞等并聚朝士貶官者數十人於白馬騾一夕盡殺之投尸於河佐吏李振曰此輩自爲清流宜投之黃河使爲濁流全忠笑而從之七月辛酉天子賜全忠迎鑾紀功碑樹於洛陽全忠欲代唐使人諭諸鎮襄州趙匡凝以爲不可遂攻之全忠如襄州軍於漢北十一月丁卯全忠至自南征辛巳天子封全忠爲魏王相國總百揆兼備九錫之命全忠怒不受十二月天子以全忠爲天下兵馬元帥全忠益怒遂弒太后

於積善宮又殺宰相柳璨太常卿張延範車裂以徇天子下詔以太后故停郊天祐三年春正月幽滄稱兵將寇魏魏假兵於全忠乃發兵攻劉仁恭之滄州兵過魏魏兵皆叛全忠盡殺之遂攻滄州軍長蘆仁恭求救於晉晉取潞州全忠乃還天祐四年夏四月壬戌全忠更名晁甲子篡唐位其兄全昱聞而叱之曰朱三爾可作天子乎時羣臣奉冊奉寶進讀稱賀遂宴於元德殿復與宗戚飲博於宮中酒酣全昱忽以投瓊擊盆中迸散晚全忠曰朱三汝本碭山一民也從黃巢爲盜天子用汝爲四鎮節度使富貴極矣柰何一旦滅唐家三百年社稷自稱帝王行當滅族

奚以博爲全忠不懌而罷丁卯使宣諭州鎮戊辰改僞號
開平元年國號梁奉唐帝爲濟陰王升汴州爲開封府建
爲東都以故東都爲西都廢京兆府爲雍州改樞密院爲
崇政院是月行營都指揮使李思安敗績於晉天祐五年
僞開平二年春正月己亥卜郊於西都弒昭宣帝於曹州
二月戊寅封鴻臚卿李崧介國公爲二王後夏五月己丑
潞州行營都虞侯康懷英及晉師戰於夾城敗績戊戌立
唐三廟冬十二月己亥以介國公爲三恪鄴國公萊國公
爲二王後天祐六年僞開平三年春正月甲戌如西都復
然燈以祈福甲子延州高萬興叛岐請降六月庚戌劉知

俊叛附於岐丹州軍亂逐其刺史李稠稠奔於岐丹州軍
亂逐其刺史宋知誨甲申襄州軍亂殺其留後王班房州
刺史楊虞叛附於蜀冬十一月己酉搜訪賢良鎮國軍節
度使康懷英伐岐克寧慶衍三州及劉知俊戰於升平敗
績天祐七年僞開平四年春正月壬辰朔始用樂九月辛
亥搜訪賢良冬十一月己丑使北面行營招討使王景仁
伐趙趙王王鎔北平王王處直叛附於晉晉師救趙十二
月癸酉頒律令格式天祐八年僞乾化元年春正月丁亥
王景仁及晉師戰於柏鄉敗績夏五月甲申改元冬十一
月高萬興取鹽州天祐九年僞乾化二年春三月丙戌屠

續唐書卷二十四
棗彊夏五月甲申全忠有疾閏月壬戌病甚謂近臣曰我經營天下三十年不意太原更昌熾如此觀其志不小天復奪我年我死諸兒非彼敵也吾無葬地矣因哽咽絕而復蘇全忠長子郴王友裕早卒次假子博王友文特愛之常留守東都兼建昌宮使次郢王友珪其母亳州營倡也爲左右控鶴都指揮使次均王友貞爲東都馬步都指揮使全忠縱意聲色諸子雖在外常徵其婦入侍往往亂之友文婦王氏色美全忠尤寵之雖未立友文而意屬焉友珪心不平全忠命王氏召友文欲付以後事友珪婦張氏亦朝夕侍側知之密告友珪曰大家以傳國寶付王氏懷

往東都吾屬死無日矣六月丁丑朔出友珪爲萊州刺史友珪益恐戊寅友珪易服微行入龍虎軍見統軍韓勅相與合謀勅以牙兵五百人從友珪雜控鶴士入伏於禁中中夜斬關入至寢殿侍疾者皆散走全忠驚起問反者爲誰友珪曰非他人也全忠曰我固疑此賊恨不早殺之汝悖逆如此天地豈容汝乎友珪曰老賊萬段友珪僕夫馮廷諤刺全忠腹刃出於背友珪自以敗氈裹之瘞於寢殿祕不發喪全忠年六十一友珪自立以友貞爲東都留守初全忠迎昭宗於鳳翔素服待罪昭宗佯爲鞵脫系呼之曰全忠爲我繫鞵全忠不得已跪而結之流汗浹背時天

子扈蹕尚有衛兵昭宗意謂左右擒全忠以殺之其如無
敢動者自是全忠被召多不至盡去昭宗禁衛皆用汴人
矣可知昭宗有英睿之氣而衰運不振又無忠義奮發之
臣夾輔左右以致全忠得肆行無忌耳全忠用兵嚴峻每
戰逐隊主帥或有沒而不反者其餘皆斬之謂之跋隊斬
健兒且多竄匿州郡疲於追捕因下令文面其暴虐多類
此

友貞全忠第三子也自友珪弑父篡位矯殺友文以弑主
之罪歸之天祐十年僞改元曰鳳歷二月駙馬都尉趙巖
至東都友貞私與之謀遣馬慎交之魏州見楊師厚計事

師厚遣小校王舜賢至洛告左龍虎統軍袁象先使討賊
是時懷州龍驤屯兵叛方捕索之乃僞爲友珪詔書發左
右龍驤在東都者皆還洛陽因激怒之曰主上以懷州屯
兵叛追汝等欲盡坑之諸將皆泣莫知所爲友貞曰先君
經營王業三十餘年今日尙爲友珪所殺汝等安所逃死
乎因出全忠畫像示諸將而泣曰汝能趨洛陽擒逆賊則
轉禍爲福矣軍士皆呼萬歲請友貞爲主二月庚寅友貞
乃遣人趣象先等以禁兵討賊遂殺友珪象先遣趙巖持
傳國寶至東都是月友貞卽位乃去鳳歷之號復稱乾化
三年復博王友文官三月丁未更名鏗夏五月楊師厚取

滄州冬十二月晉取幽州天祐十一年僞乾化四年夏四月武寧軍節度使蔣殷反天平軍節度使牛存節討之天祐十二年僞貞明元年存節克徐州三月己丑天雄軍亂賀德倫叛附於晉邠州李寶衡叛岐請附夏六月庚寅朔晉王入於魏州遂取德州十一月乙丑改元耀州溫昭圖叛岐請附是歲更名瑱天祐十三年僞貞明二年春三月鎮南軍節度使劉鄩及晉師戰於故元城敗績晉師取衛州夏六月捉生都將張溫叛降於晉秋七月晉師取襄州安國軍節度使閻寶叛附於晉九月晉師取滄州又克貝州守將張德原死之天祐十四年僞貞明三年晉師取楊

劉天祐十五年僞貞明四年冬十二月癸亥賀瓌及晉師戰於胡柳敗績泰寧軍節度使張萬進叛附於晉天祐十六年僞貞明五年春正月晉軍於德勝冬十二月晉師取濮陽天祐十七年僞貞明六年河中節度使朱友謙襲同州殺其節度使程全輝叛附於晉秋七月陳州妖賊毋乙自稱天子冬十月毋乙伏誅天祐十八年僞龍德元年夏五月丙戌朔改元冬十月天平軍節度使戴思遠及晉師戰於戚城敗績天祐十九年僞龍德二年春正月思遠襲魏州取成安二月晉王以兵至思遠收軍退保楊邨天祐二十年僞龍德三年潞州李繼韜叛晉請附夏四月己巳

續唐書卷二十四
晉王卽唐帝位於魏州改天祐二十年爲同光元年閏四月壬寅唐軍鄆州陷之五月先鋒將康延孝叛降於唐冬十月甲戌宣義軍節度使王彥章及唐軍戰於中都敗績死之唐軍取曹州梁人竊傳國寶奔於唐戊寅友貞使控鶴都將皇甫麟進刃於建國樓下遂殞年三十六梁亡述曰全忠自盜羣毒流唐室弑二君一皇后搢紳被害者不可勝數其罪大惡極卽殺之有餘辜且也內亂黷倫行同鳥獸卒至腹刃出背身裹敗旣語曰淫而不父必有子禍其信然矣友貞元凶遺孽乃底滅亡唐讎克復豈非天哉

續唐書卷二十五

海昌陳鱣謨

武林姜安
長水祝恂 全校

蜀世家第四

王建字光圖許州舞陽人也爲人隆眉廣顙多智有力先世故爲餅師建少年無賴以屠牛盜驢販私鹽爲事里人謂之賊王八後爲忠武軍卒稍遷隊將廣明元年黃巢陷長安僖宗在蜀忠武軍將鹿晏宏以兵八千屬楊復光討賊巢敗走復光以其兵爲八都都將將千人建與晏宏皆爲一都頭復光死晏宏率八都迎扈行在所過剽略行至興元逐節度使牛勣自稱留後以建等領屬州刺史已而

續唐書卷二十一
建與晉暉韓建張造李師泰等各率一都赴行在僖宗得
之大喜號隨駕五都以屬田令孜錄建等爲假子僖宗還
宮建等分典神策軍光啓元年河中王重榮召晉兵犯京
師僖宗幸鳳翔二年春三月移幸興元以建爲清道斬斫
使負玉璽以從令孜懼逼求爲西川監軍楊復恭代爲軍
容使復恭出建爲壁州刺史乃招集亡命及谿洞夷落有
衆八千以攻閬州執其刺史楊行遷又攻利州其刺史王
珙棄城走西川節度使陳敬瑄患之以問令孜令孜曰王
八吾兒也以一介召之可置麾下乃使人招建東川顧彥
朗與建有舊因至梓州謂彥朗曰十軍阿父召我我欲至

成都見陳公以求一鎮卽以其家屬托彥朗選兵二千馳
往成都行至鹿頭關敬瑄悔召建使人止之建怒破關取
漢州彥朗聞之出兵助建軍於學射山敬瑄遣將句惟立
逆戰建擊敗之於蠶北又拔德陽敬瑄遣使來讓對曰十
軍阿父召我未及門而拒之重爲顧公所疑退無歸矣令
孜登樓慰諭建與諸將截髮羅拜曰今旣無歸且辭阿父
作賊是時彥朗以其弟彥暉爲漢州刺史發兵助攻成都
三日不克而退還屯漢州敬瑄告難於朝僖宗命中使和
解之又令李茂貞以書來諭皆不從文德元年春三月建
兵攻彭州敬瑄救之乃解還於是大掠西川十二州皆被

其患是月昭宗卽位彥朗表請雪建擇大臣爲蜀帥移敬瑄他鎮乃詔宰臣韋昭度鎮蜀以代敬瑄敬瑄不受代昭宗命顧彥朗楊守亮討之以建爲招討牙內都校久之不克建謂昭度曰相公興數萬之衆討賊未效餉運久不相屬近聞藩鎮相噬朝廷姑息不暇與其勞師以事蠻方不如且靜中原以固根本昭度遲疑未決建陰令軍士擒昭度親吏於軍門嚮而食之建入白曰軍士飢須此爲食爾昭度大恐卽留符節與建而東建卽以兵扼劔門兩川由是阻絕建攻西川管內八州所至響應遂急攻成都田令孜登城呼建曰老夫與八哥相厚何嫌而至此建曰軍容

父子之恩心何敢忘然兵討不受代者天子命也令孜夜入建軍以蜀帥符印相授明日敬瑄開門迎建以蜀帥讓之建乃自稱留後大順二年冬十月癸未制授檢校司徒西川節度使管內觀察處置雲南八國招撫等使移敬瑄於雅州安置仍以其子爲刺史旣行建令人殺之於三江令孜仍監其軍復以令孜陰附鳳翔下獄餓死乾寧元年夏五月建久攻彭州都指揮使趙璋出降秋七月綿州刺史楊守厚卒其將常再榮舉城降建乾寧二年建遣王宗滌敗彥暉於楸林斬其將羅璋遂圍梓州乾寧三年夏五月昭宗詔建罷兵建收兵還成都黔南節度使王肇以其

地降於建乾寧四年宗滌復攻東川五月昭宗詔建罷兵
建不奉詔冬十月建攻破梓州彥暉自殺建以王宗滌爲
東川留後朝廷卽以宗滌爲節度使於是并有兩川之地
天復元年朱全忠劫天子幸鳳翔以兵圍之李茂貞閉城
拒守經年力窘求與全忠和建遣人聘茂貞許以兵援勸
其勿和遣宗滌將兵五萬聲言迎駕以攻興元執其節度
使李繼業而武定節度使李思敬遂以其地降建於是并
有山南西道天復三年秋八月詔封建蜀王天復四年春
二月朱全忠劫天子遷都洛陽改元天祐建與唐隔絕而
不知故仍稱天復年號天復六年又取歸州於是并有二

峽之地天復七年春二月朱全忠篡唐僞號梁改元開平
遣使以聞建拒而不納因馳檄四方會兵討梁皆不應秋
九月己亥建僭卽皇帝位國號大蜀封其諸子爲王百官
進爵有差授唐室舊臣王進等三十二人官蜀恃險而僻
建雖不知書而好與儒生設論故其僭號所用皆唐名臣
世族而於翰林學士最承恩恃臣或諫其太過則曰吾爲
神策軍時主內門魚鑰見天子待接學士雖交友不若也
今吾不及當時何謂之過邪論者多之明年正月壬午大
赦境內改元武成二月甲辰以王宗佶爲太師宗佶本姓
甘建爲忠武軍卒時掠以爲子以軍功累遷武信軍節度

使後建所生宗懿等稍長宗佶以養子心不自安與鄭騫等謀爲大司馬總六軍建以其功多優容之唐襲本以舞僮見幸於建宗佶尤易之後爲樞密使猶名呼襲襲雖內恨而外奉宗佶愈謹建怒曰宗佶名呼我樞密使是將反邪宗佶求大司馬章三上建以問襲襲因激怒建曰宗佶功臣宜急與之建心益疑宗佶上奏事自請不已建叱衛士撲殺之并賜騫死甲子遣將入歸州執梁刺史張瑋夏五月遣將會岐兵三萬攻梁雍州晉張業亦將兵應之六月丙申梁敗岐兵於幕谷遂與晉兵皆引歸是月立遂王宗懿爲太子後更名元坦又更名元膺武成二年冬十月

甲子司天監胡秀林獻永昌麻詔頒行之武成三年夏六月下詔勸農桑十二月辛巳大赦改明年爲永平永平元年春三月岐兵臨東鄙建遣王宗侃等攻之戰於青泥敗績建自將擊之岐兵解去建至興元而還秋九月築柳隄是歲始作興宮命集四部書選名儒專掌其事鑄永平元寶錢永平二年春正月封張魯爲扶義公諸葛亮爲安樂公二月丁巳梁遣光祿卿盧毗來聘推建爲兄其印文曰大梁入蜀之印宰相張格曰唐故事奉使四夷其印文曰大唐入某國之印今梁以兄事陛下柰何卑我如夷狄建怒欲殺梁使者格曰此梁有司之過耳不可以絕兩國之

權已而朱全忠被弑建遣將作監李紘弔之遂刻其印文曰大蜀人梁之印三月詔張格編纂開國以來實錄秋九月辛巳改劍南東川曰武德軍是時升雲安監爲安州詔行正象麻永平三年六月丙子以道士杜光庭爲金紫光祿大夫封蔡國公進號廣成先生秋七月太子元膺殺太子少保唐襲襲爲建所嬖元膺易之屢譖於朝建懼其交惡乃罷襲出鎮已而罷歸元膺廷疏其過失建益不說是月七夕元膺召諸王大臣置酒而集王崇翰樞密使潘峭翰林學士毛文錫不至元膺怒曰集王不來峭與文錫教之耳明日元膺白建峭及文錫離間諸王建怒將罷之元

膺出而襲入建以問之襲曰太子謀作亂欲召諸將諸王以兵錮之然後舉事耳建疑之襲請召屯營軍入衛元膺初不爲備聞襲召兵以爲誅已乃與伶人安悉香軍將喻令殊率天武兵自衛擒峭及文錫而笞之幽於其家召大將徐瑤常謙率兵出拒襲戰於神武門襲中流矢墜馬死建遣王宗賀以兵討之元膺兵敗皆潰去元膺匿躍龍池檻中明日出而丐食蜀人識之以告建遣宗翰招諭之未至而爲衛兵所殺建乃立其幼子鄭王宗衍爲太子永平四年春正月丙子命皇太子判六軍開崇勳府置僚屬後更名天策府冬十二月癸未指揮使王鐸攻岐階州及固

鎮破細沙等十一寨指揮使王崇儼破岐長城等關四寨
永平五年秋九月以王宗綰爲北路行營都制置使招討
使王宗播攻秦州招討使王宗瑤副使王宗翰攻鳳州冬
十一月辛未宗綰等攻岐兵於金沙谷王宗鐸克階州宗
綰克成州宗瑤克鳳州於是得其四州之地十二月丁未
受秦鳳階成之俘大赦境內改明年元曰通正置武興軍
於鳳州割文興二州隸之是歲起壽昌殿於龍興宮畫建
像於壁又起扶天閣畫諸功臣像通正元年二月鑄通正
元寶錢秋八月建文思殿命清資五品正員官購羣書實
之九月庚申新宮成冬十月己亥大赦天下十二月戊申

再大赦改明年元曰天漢曰號大漢改明年元曰光天光
天元年春正月乙亥朔大赦復國號曰蜀鑄光天元寶錢
六月建卒年七十二在位十二年建晚多內寵賢妃徐氏
與妹淑妃皆以色進專房用事交結宦者唐文展等于與
外政建年老昏耄事無大小皆決文展及建疾以兵入宿
衛盡謀去建故將故將大臣問疾皆不得入見久之宗弼
等排闥入言文展欲爲變乃殺之建因謂老將大臣多許
昌人必不爲吾子用因思擇人未得而卒子衍立
衍字化源初名宗衍襲位後去宗名衍建之幼子也母徐
賢妃以寵得立爲人方頤大口垂手過膝顧目見耳頗知

學問童年卽能屬文有才思尤好靡麗之辭常集豔體詩
二百篇號曰煙花集凡有所著蜀人皆傳誦焉及卽位荒
淫無度委政於宦者宋光嗣等而以韓昭等爲狎客起宣
華苑苑有重光太清延昌會真之殿清和迎宣之宮降真
蓬萊丹霞之亭飛鸞之閣瑞獸之門又作怡神亭與諸狎
客日夜酣飲其中衍立之明年改元乾德元年春正月大
赦鑄乾德通寶錢改龍躍池爲宣華苑乾德二年秋八月
衍北巡以同平章事王鐸判六軍諸衛事衍戎裝披金甲
珠冠錦袖執弓挾矢旌旗戈甲百里不絕百姓望之謂之
灌口神以宮人二千從至漢州駐西湖泛舟奏樂飲宴彌

日秋七月駐軍安遠城還至益昌巡閭中舟子皆衣錦繡
衍自製水調銀漢曲命樂工歌之所在供億人不堪命乾
德三年春正月甲寅還成都秋九月詔置賢良方正博通
經史明達吏理識洞兵機沈滯邱園五科令黃衣選人白
衣舉人投策就試吏部考較乾德四年春二月御文明殿
試制科三月禁士民不得戴小帽衍好私行常戴大帽宿
於倡家索筆題曰王一來云恐人識之故有是令乾德五
年春三月上巳宴怡神亭衍自執版唱霓裳羽衣及後庭
花思越人曲遊浣花谿龍舟綵舫綿亘十里自百花潭至
萬里橋遊人士女珠翠夾岸是時莊宗卽皇帝位國號唐

續唐書卷二十一
改元同光乾德六年春正月禁民戴危腦帽其製狹小俛首卽墜在位者惡之莊宗平梁遣使告捷蜀人恟懼致禮復命稱大蜀國主致書大唐皇帝詞理稍抗莊宗不能容遣客省使李儼報聘且市宮中珍玩蜀人皆禁而不出十二月辛卯改明年元日咸康咸康元年春正月甲午朔大赦鑄咸康元寶錢三月衍謁永陵自爲尖巾民庶皆效之還宴怡神亭妃嬪皆戴蓮花冠衣道服酒酣免冠其髻髮然更夾面連額渥以朱粉號醉粧夏四月宴會羣臣忽舉觴不悅曰北有後唐南有蠻詔不能弔伐是所憂也特進顧在詢曰朝廷有十臣在亦復何憂太子洗馬林罕因著

十在文以進六月詔增閏十二月麻紙印造施行初頒麻無閏月及是見唐麻置閏遂續補焉秋七月丙午衍應聖節列山棚得賢門下有暴風摧折隕地翌日雷振應聖堂傾其兩柱九月衍與母同禱青城山官人皆衣雲霞之衣衍自製甘州詞令官人唱之其詞哀怨聞者悽愴衍常獵於子萊山是歲又遊彭州陽平山漢州三學山爲樂冬十月遊秦州羣臣切諫不聽行至梓潼大風發屋太史曰此貪狼風也當有敗軍殺將者衍不省至綿谷而唐師入境衍懼遽還唐師所至州縣皆迎降衍留王宗弼守綿谷遣王宗勳宗儼宗昱率兵以拒唐師宗勳等至三泉望風退

續唐書卷三十五
走衍令宗弼誅宗勳等宗弼反與宗勳等謀送欵於唐十
一月丙申衍至成都百官及後宮迎謁七里亭衍雜宮人
作回鶻隊以入城知唐師已逼但掩袂泣下旣而宗弼擁
兵還成都遂劫衍及母妻諸子還於天啓宮收其璽綬金
寶魏王繼岌至成都衍君臣面縛輿櫬出降於七里亭命
翰林學士李昊草降表又命中書侍郎王鐔草降書繼岌
受壁郭崇韜解縛焚櫬承制釋罪君臣東北向拜謝莊宗
召衍賜詔曰固當裂土而封不必薄人於險三辰在上一
言不欺衍奉詔忻然就道曰不失爲安樂公乃率其宗族
及僞宰相王鐔等并將佐家族數千人東赴洛陽同光四

年春二月行至鳳翔莊宗用伶人景進計遣宦者向延嗣
殺衍及其宗族衍母徐氏臨刑呼曰吾兒以一國迎降反
以爲戮信義俱棄吾知禍不旋踵矣夏六月百官至洛陽
王鐔皆量授諸州府刺史少尹判官司馬惟永平節度使
馬全不食而卒初唐師伐蜀所在迎降獨武信軍節度使
王宗壽不降聞衍已銜壁大慟從衍東遷至岐陽以賄賂
守者得入見衍衍泣下沾襟曰早從王言豈有今日衍死
宗壽至澠池聞莊宗遇弒亡入熊耳山天成三年出詣京
師上明宗書求衍宗族葬之明宗嘉其忠以爲保義軍行
軍司馬封衍順正公許以諸侯禮葬宗壽得王氏十八喪

葬於長安南之三趙邨

述曰王建崛起草間稱雄蜀鎮當唐室陵夷尙能仍天復之號拒無道之梁惜乎不久卽僭號改元是以梁之續耳至其斂民傷財婦寺亂政釁起蕭牆抑鬱而死厥子衍荒淫滋甚恣意嬉遊不以國家爲事遂爲唐所滅蓋孽由自取也

續唐書卷二十五終

續唐書卷二十六

海昌陳鱣謨

武林姜安
長水祝恂全校

後蜀世家第五

孟知祥字保胤邢州龍岡人也祖察父巖世爲郡校伯父方立終於邢洛節度使從父遷位至澤潞節度使知祥溫厚知書弱冠補太原衛指揮使晉王鎮太原妻以其弟克讓之女累遷親衛軍使天祐五年莊宗嗣位改馬步軍教練使出知嵐州召爲中門使莊宗與朱全忠夾河頓兵知祥參謀應變事無留滯中官屢以罪被誅知祥懼禍乃薦郭崇韜爲副知祥遷馬步軍都虞侯莊宗建號除太原尹

知留守事同光三年冬十二月魏王繼岌伐蜀郭崇韜爲
招討使崇韜臨行奏曰臣等平蜀陛下擇帥無如知祥因
以知祥爲成都尹劍南西川節度使馳至京師有司出內
府幄幙珍玩館於官中莊宗指示知祥曰吾聞蜀王之富
無異於此以卿親賢故以相付同光四年正月戊辰知祥
至成都而崇韜已死魏王繼岌引軍東歸先鋒康延孝反
攻破漢州知祥遣大將李仁罕會任圜董璋等兵擊破延
孝得其將李肇等及其兵數千以歸而莊宗崩繼岌死明
宗八立知祥乃訓練甲兵陰有王蜀之意冬十月加知祥
檢校太傅兼侍中是時安重誨用事以知祥莊宗舊識方

據大藩慮久而難制欲潛圖之客省使李巖以常使蜀知
其細乃獻謀於重誨以己爲參軍庶効方略以制知祥朝
廷可之天成二年正月巖至蜀知祥延接甚至徐謂巖曰
都監前奉使伐蜀兩川俱至破滅其怨已深今何得來此
卽遣人執巖斬之明宗不能治其後朝廷每除劍南牧守
皆令提兵而往分守郡城時董璋作鎮東川已數年矣亦
有雄據之意會朝廷以夏魯奇鎮遂州李仁矩鎮閬州皆
領兵數千赴鎮且授以密旨令制禦兩川董璋覺之乃與
知祥通好結姻以固輔車之勢知祥慮唐軍驟至與遂閬
兵合則勢不可支遂與璋協謀令璋以本部軍先取閬州

知祥遣大將李仁罕趙廷隱率兵圍遂州長興元年冬唐軍伐蜀至劔門長興二年以遂閬既陷又糧運不接乃班師九月董璋反長興三年夏六月進封蜀王承制行賞諸將進秩有差知祥又破董璋自領兩川節度使長興四年春二月命修蜀故主王建墓禁樵採三月宴府僚於王氏宣華苑謂左右曰使衍不荒於政有賢臣輔之繼岌小子豈能取耶趙季良曰亦天時也不有所廢君何以興知祥大喜秋九月立三廟冬十一月戊戌明宗崩制服大臨應順元年春正月趙季良上表陳符瑞率百官勸進知祥曰德薄不足辱天命以蜀王而老於孤足矣季良曰將士大

夫盡節効忠於殿下止望攀鱗附翼今不正大統無以足軍民推戴之心閏正月己巳知祥遂僭位是日大風晝暝二月癸酉以季良守司空平章事百官進秩有差三月遣使持書至洛稱大蜀皇帝夏四月辛巳大赦改元明德六月往大慈寺避暑觀明皇僖宗御容宴羣臣於華嚴閣下七夕與宮人乞巧於丹霞樓遂寢疾命子昶監國甲子知祥薨年六十一偽謚明孝皇帝廟號高祖葬和陵

昶字保元知祥第三子也初名仁贊知祥爲西川節度使昶爲行軍司馬知祥僭號以昶爲東川節度使知祥病昶監國已薨而祕不發喪趙季良等立昶遂於柩前卽位時

年十六不改元仍稱明德元年秋九月加季良司徒百官
進秩有差冬十二月頒勸農桑詔析鹽縣雍江草市置招
茸縣明德二年春二月丙寅大赦夏六月賜江原縣孝子
張元帛三十段及米酒仍付史館編錄明德三年冬十一
月石敬瑭篡位僞號晉改元天福十二月己亥申嚴錢禁
明德四年十二月戊申大赦改明年元曰廣政廣政元年
三月上巳節遊大慈寺宴從官於玉谿縣分韻賦詩是歲
鑄廣政通寶錢廣政二年夏六月地震是歲國中大水祖
廟壞廣政三年春正月上元節觀燈露臺夏五月地震冬
十月地震廣政四年夏五月昶著官箴頒於郡縣曰朕念

赤子旰食宵衣託之令長撫養安綏政在三異道在七絲
驅雞爲理留犢爲規寬猛得所風俗可移無令侵削無使
瘡痍下民易虐上天難欺賦輿是切軍國是資朕之爵賞
固不逾時爾俸爾祿民膏民脂爲人父母罔不仁慈特爲
爾戒體朕深思昶好學凡爲文章皆本於理謂李昊徐光
溥曰王衍浮薄而好輕豔之辭朕不爲也嘗勅史館集古
今韻會五百卷廣政五年春正月地震三月宴後苑賞瑞
牡丹從官皆賦詩冬十月地震廣政六年春大選良家子
以備後宮州縣騷然民多立嫁其女謂之驚婚二月丙午
烈祖崩元宗皇帝卽位改元保大元年蜀廣政七年春正

月戊戌元宗遣使聘蜀副以六鶴昶命少府監黃筮寫六鶴於便坐之壁名曰六鶴殿是歲門下侍郎同平章事毋昭裔按雍都舊本九經命平泉令張德劔書而刻諸石以貯成都學宮廣政九年析導江縣立灌州置石氏屯田務於梁山縣是歲契丹滅晉廣政十年春二月劉知遠稱帝於太原國號漢中國多故雄武軍節度使何建以秦成階三州附於蜀昶因遣孫漢韶攻下鳳州於是悉有王衍故地漢將趙思綰據永興王景崇據鳳翔反皆送款於蜀蜀遣諸將出應思綰宰相毋昭裔切諫以爲不可然昶志欲圖關中甚銳乃遣安思謙出兵以東已而漢誅思綰蜀諸

將皆罷歸而思謙出兵無功多殺士卒以威衆昶與翰林學士王藻謀殺思謙而邊吏有急奏藻不以時間輒啓其封昶怒其殺思謙也藻在側因并擒藻斬之秋八月漢州奏孝子范文通廬父墓羣虎見之避服因賜以羊酒束帛是歲始行郊祀禮廣政十一年秋九月己未始置匭函以執政多壅蔽因立此法以通下情未幾改曰獻納函是時民間多納麩錢廣政十二年春正月置吏部三銓禮部貢舉秋八月遊浣花谿是時蜀中百姓饒富都人士女傾城遊玩珠翠綺羅名花異卉馥郁森列昶御龍舟觀水嬉上下十里望若神仙冬十月召百官宴芳林苑廣政十三年

續唐書卷二十六
五
秋九月合城上植芙蓉張以帷幙望之皆如錦繡廣政十
四年冬十月彭山頭副將楊富獲銅印一於江岸以進凡
篆文十八字昶命嚴築作瑞篆記是歲詔勒諸經於石祕
書省校書郎孫朋古寫周禮國子博士孫逢吉寫周易校
書郎周德政寫尚書簡州平泉令張德釗寫爾雅字皆精
謹廣政十五年春正月下詔勸農夏六月乙酉朔大宴羣
臣教坊優人作灌口神墜二龍之象須臾天地皆暝大雨
雹明日灌口奏岷江大漲鎖塞龍處鐵柱頻撼其夕大水
入成都壞延秋門深丈餘溺數千家摧司天監及太廟戊
戌大赦境內賑水災之家冬十一月地震十二月天雨毛

廣政十六年春三月地震夏五月重午節昶侍其母遊凌
波殿競渡殿卽前蜀宣華苑也秋九月有爰居集瑞鼎門
廣政十八年春二月周師伐蜀攻自秦州蜀以韓繼勳爲
雄武軍節度使聞周師至歎曰繼勳豈足以當之即客省
使趙季札請行乃以季札爲秦州監軍使行至德陽遽馳
還奏事昶召問之季札惶懼不能道一言昶怒殺之乃遣
高彥儔李廷珪出堂倉以拒周師彥儔大敗走青泥於是
秦成階鳳復入於周昶懼分遣使者聘於南唐北漢以張
形勢廣政十九年大赦賜民今年夏租廣政二十年夏六
月周人歸蜀秦鳳之俘昶寓書謝稱大蜀皇帝周人不荅

昶曰朕郊祀天地稱天子時爾方鼠竊作賊何得相薄耶
冬十二月旌表蓬州孝子程崇雅門廣政二十一年春三
月周兵犯金陵取淮南十四州諸國皆懼荆南高保融以
書招蜀歸周蜀以前常致書不荅乃止廣政二十四年冬
十一月爰居鳴於庭射之不中廣政二十五年春正月立
秦王元佶爲太子是歲行用鐵錢昶幸晉漢之際中國多
故而據險一方君臣務爲奢侈以自娛至於溺器皆以七
寶裝之宋師已下荆潭昶益懼廣政二十六年春三月宋
師平荆湖蜀郎吏將卒先在江陵者悉命放還夏四月遂
州方義縣雨雹大如斗五十里飛鳥六畜皆死廣政二十

七年春遣使持帛書通好於太原尊劉鈞爲天子至境上
爲疆吏所獲宋祖怒命王全斌等由鳳夔一路領兵討蜀
昶遣王昭遠趙崇韜等拒戰曰今日之師皆卿所召勉力
爲國家立功命宰相李昊等餞於城外昭遠手執鐵如意
指揮軍事自比諸葛孔明人皆竊笑之冬十二月宋師至
興州所在不戰而下遂拔利州崇韜布戰陣將戰昭遠據
胡床不能起免胄而逃爲戰騎所獲昶大懼成都震恐廣
政二十八年春正月宋師陷夔州節度使高彥儔自焚死
昶問計於左右老將石頽謂宜聚兵堅守以敝之昶歎曰
吾父子以豐衣美食養兵四十年一旦臨敵不能東向發

續唐書卷二十六
一矢雖欲堅壁誰與効命邪乃命李昊草表以降初昊事王衍爲翰林學士衍之亡也昊爲草降表至是又草焉蜀人夜書其門曰世修降表李家當時傳以爲笑昶舉族赴宋時自二江至眉州萬民擁道痛哭慟絕者凡數百人昶亦掩面而泣及至京師拜檢校太師兼中書令封秦國公七日而卒年四十七追贈楚王謚恭惠其母李氏本莊宗嬪御以賜知祥累從征伐備歷艱難而性尚慈儉才亦明辨居恆戒昶以固富壽爲務初頗遵行之廣政末典兵者多非其人母盡言告戒昶不能從入宋甚見優禮詔書呼爲國母昶之卒也李氏不哭以酒酹地祝曰汝不能死社

稷苟生以取羞吾所以忍死者以汝在也吾今何以爲生因不食而死遂同昶葬洛陽

述曰知祥雄據西蜀克定東川不動聲色斬李嚴除董璋固一世之傑也而撫民以仁接士以禮馭下以威故歿之日蜀人哀焉嘗見其所刻石經於淵民字尙爲高祖太宗避諱缺筆雖竊帝號猶未自絕於唐耳昶能肇興文教勸農恤刑亦不失爲中主惟其任用匪人奢侈過度以致身危國削舉族爲俘豈不惜哉

續唐書卷二十六終

續唐書卷二十七

海昌陳鱣謨

武林姜安
長水祝恂 全校

南漢世家第六

劉隱祖安仁上蔡人也後徙閩中商賈南海因家焉父謙
為廣州牙將乾符五年黃巢攻破廣州去略湘湖間廣州
表謙封州刺史賀江鎮遏使以禦梧桂以西歲餘有兵萬
人戰艦百餘艘謙三子曰隱台巖乾寧元年冬謙卒廣州
表隱代謙封州刺史乾寧二年嶺南節度使劉崇龜死薛
王知柔代為帥乾寧三年冬行至湖南廣州將盧琚軍玘
作亂知柔不敢進隱以封州兵攻殺琚玘迎知柔知柔辟

隱行軍司馬其後徐彥若代知柔表隱節度副使委以軍政天復元年冬彥若卒推隱爲留後天祐元年拜隱清海軍節度使天祐二年加隱同平章事天祐四年僞梁開平元年夏五月己卯加隱檢校太尉兼侍中封大彭王天祐五年僞梁開平二年冬十月兼靜海軍節度安南都護天祐六年僞梁開平三年夏四月庚子改封南平王隱父子起封州遭世多故數有功於嶺南遂有南海隱復好賢下士時天下已亂中朝人士以嶺外最遠可以避地多遊焉唐世名臣謫死遠方者往往有子孫或當時仕宦遭亂不得還者皆客嶺表王定保倪曙劉濬周傑楊洞潛之徒皆

招禮之而趙光裔李殷衡以奉使往俱辟置幕府待以賓客卒用此數人致治焉天祐八年僞乾化元年春三月隱薨年八十三謚曰襄葬德陵弟龔立

龔初名巖謙庶子也母段氏生龔於外舍謙妻韋氏素妬殺段氏養龔爲己子及長身長七尺垂手過膝善騎射隱爲行軍司馬龔亦辟薛王府諮議參軍更名曰陟隱鎮南海龔爲副使隱卒遂嗣位天祐九年僞乾化二年夏四月除清海軍節度使檢校太保同平章事天祐十年僞乾化三年春正月加檢校太傅朱友貞卽位悉以隱官爵授龔封南海王天祐十四年僞貞明三年秋八月癸巳龔僭皇

帝號國號大越改元乾亨追尊祖考及兄立三廟置百官以楊洞潛爲兵部侍郎李殷衡禮部侍郎倪曙工部侍郎趙光裔兵部尙書皆平章事光裔自以唐甲族恥事僞國怏怏思歸龔乃習爲光裔手書遣使至洛召其二子并家屬皆至光裔驚喜爲盡心焉天祐十五年乾亨二年冬十一月改國號漢鑄乾亨重寶錢又鑄鉛錢十當銅錢一天祐十七年乾亨四年春二月始立學校置選部貢舉放進士明經十餘人如唐故事歲以爲常同光元年乾亨七年夏四月己巳莊宗卽皇帝位改元龔懼冬十月改越常縣爲茂名縣同光二年乾亨八年龔自將兵侵閩屯汀漳境

上爲閩人所擊敗歸同光三年乾亨九年春正月龔遣宮苑使何詞使於唐稱大漢國主致書上大唐皇帝且覘强弱二月甲申詞至魏還言唐必亂龔大悅自是不復通中國龔性好夸大嶺北商賈至南海者多召之使升宮殿示以珠玉之富自言家本咸秦恥王蠻土呼唐天子爲洛州刺史冬十二月有白虹化爲白龍見於南宮三清殿改元白龍更名曰龔以應龍見之祥後有胡僧言滅劉氏者龔也乃復改名龔義本飛龍在天而字音儼是歲長和國驃信鄭旻遣其布燮鄭昭淳致朱鬃白馬以求婚遂以隱女增城公主妻之長和卽同詔也同光四年白龍二年莊宗

崩明宗卽位改元天成三年春三月楚大舉水軍侵漢圍封州龔以周易筮之遇大有於是大赦改元大有命救封州大敗楚兵於賀江長興元年大有三年秋九月遣將梁克貞李守鄜攻交州擒靜海節度使曲承美至南海龔登儀鳳樓受俘謂承美曰公常以我爲僞廷今反面縛何也承美頓首伏罪乃赦之承美顥子也克貞又攻占城掠其寶貨而歸長興二年大有四年冬十二月愛州將楊廷藝叛攻交州刺史李進遜歸乃遣承旨程寶攻之寶戰死長興三年大有五年立其諸子爲王清泰三年大有九年夏四月遣將孫成侵楚蒙桂二州不克昇元元年大有十年

春二月交州牙將皎公羨殺楊廷藝自立冬十月唐遣使來告卽位昇元二年大有十一年冬十月楊廷藝故將吳權攻交州公羨乞師於龔乃封子洪操交王出兵白藤以攻之龔率兵駐海門權已殺公羨逆戰海口植鐵楸海中權兵乘潮而進洪操逐之潮退舟還輾楸者皆覆洪操戰死龔收餘衆而還昇元四年大有十三年冬十月遣都官郎中鄭翺如金陵賀仁壽節昇元五年大有十四年龔寢疾遣使區延保入聘金陵龔爲人辨察多權性好奢侈悉聚南海珍寶以爲玉堂珠殿又用刑殘酷爲刀鋸支解湯鑊之刑每視殺人不覺朶頤垂涎呀呷人以爲真蛟蜃也

後又猜忌士人專任宦者昇元六年大有十五年春三月
丁丑薨年五十四謚天皇大帝葬原陵子玠立

玠初名洪度龔第二子也小字壽雋初封賓王改封秦王
龔子耀樞龜圖皆早死玠次當立而龔以不類已欲立洪
昌陰與王翻謀欲出之於邕州并出其弟洪熙於容州逾
次立洪昌會蕭益力諫不果玠乃卽位改元光天元年夏
四月遣使蕭規如金陵告哀又卽遣孫惠告卽位秋七月
妖人張遇賢反自稱中天八國王僞改元永樂攻陷循州
玠遣弟洪昌洪杲攻之不克被圍於錢帛館裨將萬景忻
陳道庠力戰救之得免玠在殯刀伶人作樂飲酒宮中俾

男女以爲樂或以墨縷與倡女夜行出入民家由是山海
間盜賊競起玠莫能省洪熙日益進聲妓誘爲荒恣玠亦
頗疑諸弟圖己勅宦官守宮門入者皆露索玠酷好手搏
洪熙令指揮陳道庠引力士劉思潮等五人習爲角觝以
獻保大元年光天二年春三月丙戌玠與諸弟宴長春宮
闕角觝至夜大醉起道庠與思潮等掖玠拉殺之年二十
四謚曰殤弟晟立

晟初名洪熙龔之幼子也封晉王旣弒玠遂自立改元應
乾夏五月殺其弟洪杲晟旣弒兄立不順懼衆不服乃益
峻刑法以威衆已而洪杲屢請討賊陰勸誅劉思潮等以

止外議思潮等反譖洪杲有二心遂及於禍冬十一月丁亥大赦改元乾和保大二年乾和二年春三月遣兄洪昌謁陵於海曲至昌華宮使盜殺之冬十月丙午又殺其弟洪澤於邕州保大三年乾和三年秋八月甲子殺其弟洪雅九月又殺劉思潮等五人陳道庠懼不自安其友鄧伸以荀悅漢紀遺之道庠莫能曉伸罵曰愍獠韓信誅而彭越醢皆在此書矣道庠悟益懼晟聞之大怒以道庠伸下獄保大四年乾和四年秋九月殺道庠於市夷其族保大五年乾和五年劉知遠自立爲帝僞國號漢更稱天福十二年秋九月晟殺其弟洪弼洪道洪益洪濟洪建洪暉洪

照恐於其子爭國故同日見殺是歲置湯鑊鐵牀劊剔等刑號曰生地獄保大六年乾和六年秋八月遣工部郎中知制誥鍾允章求婚於楚不許晟怒問允章馬公復能經略南土乎允章曰楚兄弟方爭亡不暇安能害我晟曰然希廣懦而且吝其士卒忘戰日久此乃吾進取之秋也冬十二月辛巳遣巨象指揮使吳珣等將兵擊楚攻賀州楚遣決勝指揮使徐知辛將兵五千來救未至已拔賀州珣鑿大窋於城下覆以竹箔加土於上楚兵逼城悉陷窋中死者無算楚人皆走珣復攻桂州轉掠全州而還保大九年乾和九年春正月郭威篡位僞國號周改元廣順冬十

二月遣內侍潘崇徹等攻彬州元宗使邊錡發兵來援與崇徹等遇戰不勝崇徹等遂取彬州晟益得志遣巨艦指揮使暨彥贇以兵入海掠商賈金帛作離宮遊獵益修葺南宮大明昌華甘泉玩華秀華玉清太微諸宮凡數百不可勝紀殿側皆置宮人以候曉名曰候窗監嘗夜飲大醉以瓜置伶人尙玉樓項拔劔斫之以試劔因并斬其首明日酒醒復召玉樓侍飲左右白已殺之晟歎息而已保大十年乾和十年夏四月元宗遣統軍使侯訓全州刺史張巒攻桂州楚兵伏於山谷待之及戰伏兵四起夾擊訓敗死巒退保全州冬十月湖南王進逵率溪洞蠻攻彬州潘

崇徹敗之於蠓石保大十一年乾和十一年秋九月晟寢疾封子繼興衛王璇興桂王慶興荆王保興禎王崇興梅王保大十二年乾和十二年春正月壬辰周主殂柴榮嗣位改元顯德晟親耕藉田交州吳昌濬遣使稱臣初吳權據交州權死子昌岌立又死弟昌濬立故來稱臣時遣給事中李璵以旌節招之璵至白州昌濬使人止璵曰海賊爲亂道路不通璵不果行夏四月晟殺其弟洪邈於邕州保大十三年乾和十三年夏六月戊午又殺其弟洪政於禎州於是龔之諸子盡矣保大十五年乾和十五年晟聞中朝屢爲周人所敗憂形於色遣使人貢又爲湖南所隔

乃治戰艦修武備又常自言知星會月食牛女間出書占之歎曰吾當之矣因爲長夜之飲中興元年乾和十六年春二月卜葬域於興王府城北運甓爲壙親臨視之秋八月辛巳展薨年三十九謚曰文武光聖明孝皇帝葬昭陵子銀立

銀初名繼興封衛王晟之長子也及卽位改今名改元大寶晟性剛忌不能任臣下委政於宦者至銀尤愚專任龔澄樞陳延壽及才人盧瓊仙等臺省備員而已機密事多不與聞又踵祖父之奢立萬政殿飾一柱凡用白金三千又以銀爲殿衣間以雲母無名之費日有千萬元宗交泰

二年大寶二年秋七月尙書右丞參政事鍾允章請誅亂法者數人以正紀綱銀不從宦官聞而惡之冬十一月內侍監許彥真誣允章謀反龔澄樞李託證成之銀殺允章并其二子交泰三年大寶三年春正月甲辰周禪位於宋宋改元建隆內常侍邵廷珣言真主已出必將盡有海內其勢非一天下不已宜修兵爲備不然悉珍寶奉中國遣使通好銀懵然莫以爲慮惡其言直深恨之三月銀殺其弟璇興先是陳延壽進謀曰先帝之所以得傳陛下者由盡殺羣弟也銀領之由是殺璇興上下咸怨是歲命荔枝熟時設紅雲宴以樂後宮以爲常後主元年大寶四年芝

菌生宮中野獸觸寢門苑中羊吐珠并芴石自立行而仆
後主二年大寶五年龔澄樞誣許彥真謀反因族誅之後
主三年大寶六年冬十一月銀作燒煮剝剔刀山劔樹之
刑後主四年大寶七年秋九月宋將潘美尹崇珂克彬州
戍將暨彥贊刺史陸光圖死之餘衆退保韶州後主十年
大寶十三年秋九月宋詔江南以書諭銀稱臣銀怒囚使
者龔慎儀宋合潭州防禦使潘美出師師次白霞銀遣龔
澄樞守賀州郭崇岳守桂州李託守韶州以備未幾美平
賀州冬十月平韶州又平桂州十一月平連州銀曰韶桂
連賀本屬湖南今北師取之足矣吾知不復南也其愚如

此後主十一年宋開寶四年春正月宋平英雄二州銀將
潘崇徹先降師次瀧頭銀遣使請和且求緩師二月師度
馬逕銀遣左僕射蕭淮奉表請降銀遑迫復令整兵拒命
美等進師銀遣弟保興率文武詣美軍降不納龔澄樞等
謀曰北軍來利吾國寶貨爾焚爲空城必不能住乃縱燔
其宮殿府庫鎮以海舶十餘悉載珍寶嬪御將入海宦官
樂範竊其舟以逃歸宋師次白田銀素衣白馬以降獻俘
京師赦銀爲千牛衛大將軍封恩赦侯太平興國五年銀
薨年三十九追封南越王葬韶州

述曰劉氏以區區廣南之地僭號改元傲很明德荼毒生

續唐書卷二十七
九
靈抑且世濟其凶視同氣如仇讎棄人命猶草芥宜其速
亡乃位歷三傳年踰六十其後亡也猶幸也夫

續唐書卷二十七終

